

Protocol no. 1
Sezzüda da mardi, 10 schner 2011 – 20.00 – 23.45

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)

1 020.309 Cuosts generals e scolaziuns dal personal
Scoulaziun a regard taxaziun d'impostas

La manadra da l'uffizi d'impostas dal cumün da Sent ha il giavüschi d'as scolar inavant sül sector da las taxaziuns d'impostas. La scoulaziun cun examen final ha lö d'ürant 13 mez dis dal 2012 a Cuira. Ils cuosts per la scoulaziun e las spaisas da viadi importan fr. 1'680.--. Causa ch'id es important per ün cumün cha'l personal possa muossar sü eir tschertas cumpetenzas spezialas impustüt eir in vista ad ün'eventuala fusiun, decida il Cussagl cumünal da conceder il credit da fr. 1'680.-- per quista scoulaziun. Las cundiziuns in connex culla scoulaziun vegnan stipuladas in üna cunvegna tanter il Cumün e l'impiegada.

2 020.309 Cuosts generals e scolaziuns dal personal
Cuors da perfacziunamaint per actuariats

L'actuara fa la dumonda da pudair tour part ad ün cuors da perfecziunamaint per formular texts, protocols e comunicaziuns da pressa chi ha lö a la HTW a Cuira e vain organisà da l'uniun grischuna d'impiegats da cumüns. Il cuors cuosta per commembers da l'uniun fr. 150.--. Il Cussagl cumünal conceda il credit da fr. 150.-- per frequentar quist cuors.

3 012 EXECUTIVA
Cuors per ufficiants e personal dal sector da fabrica e planisaziun

L'associaziun grischuna per il svilup dal territori organisescha ün cuors fundamental a regard il proceder in connex cun permiss da fabrica tenor la nouva ledscha da planisaziun. Quist cuors vala sco basa per ün cuors da certificaziun pels sectors da fabrica e planisaziun chi vain lantschà a partir da prümvaira chi vain. Il Cussagl cumünal propuona cha'l schef da fabrica ed il manader tecnic frequentan quist cuors.

Ün ulteriur cuors a regard las cundiziuns ed il proceder in dumondas da submissiun vain organisà dal Chantun. Il Cussagl cumünal propuona cha'l manader tecnic e l'actuara chi sun cunfruntats cun dumondas da submissiun piglian part a quist cuors.

Tuots duos cuors sun gratuits.

4 012 EXECUTIVA
Eleccziun dal vicecapo e scumpart dals decasteris

Sco vicecapo pel trienni 2012-2014 vain tschernü Andri Poo

Tenor la constituziun cumünala as constituìscha il Cussagl cumünal sves. Ils departamaints vegnan scumpartits seguaintamaing:

Albert Mayer (capo) (substitut Andri Poo)

Schef da finanzas, personal, administraziun, affars externs e survaglianza generala

Dumeng Jann (substitut Albert Mayer)

Schef da fabrica, planisaziun, traffic e defaisa civila

Men Caviezel (substitut Dumeng Jann)

Schef da god, agricultura, alps, pas-chs, vias champerstras, terrains cumünals, deponias, chavas e pumpiers

Marianne Werro (substitut Men Caviezel)

Schefa da turissem, sunteri, cultura, sanità, bainesser social, immundizchas e pulizia

Andri Poo (substitut Marianne Werro)

Schef da scoula, vias in cumün, aua, chnalisaziun, sarinera ed energia.

5 012 EXECUTIVA
Eleccziun da las cumischiuns

Il Cussagl cumünal elegia las seguaintas personas illas cumischiuns:

Cumischiun sociala

Albert Mayer e Claudia Luppi (manadra da l'uffizi social)

Cumischiun da fabrica

Dumeng Jann, Walter Casura, Urs Domenig

Cumischiun da planisaziun

Dumeng Jann, Andri Poo, Albert Mayer, Walter Casura, Cristina Gregori Linsel

Cumischiun da sauaziun

Men Caviezel, Curdin Horber, Jachen Zanetti

Cumischiun Cità d'energia

Andri Poo, Men Caviezel, Jon Carl Rauch

Cumischiun da lavinas

Cla Rauch, Mario Riatsch, Not Buchli, Jöri Felix

6 012 EXECUTIVA
Eleccziun dals delegats

Il Cussagl cumünal deputescha las seguaintas personas i'ls differents gremis:

Pro Engiadina Bassa (PEB) / Center da sandà Engiadina Bassa (CSEB) / Tir Urezzas /
Pendicularas Motta Naluns SA / Uffizi fundiari

Albert Mayer

Pumpiers Pisoc

Men Caviezel

Chüra d'uffants / Museum EB / Chasa Puntota

Marianne Werro

Cussagl da scoula / Institut Otalpin Ftan (HIF) / Pro aua minerala

Andri Poo

PLANISAZIUN DAL TERRITORI

Revisiun totala da la planisaziun cumünala

La cumischiun da planisaziun dal trienni 2008-2011 ha tut per mans la revisiun totala da la planisaziun cumünala dal cumün da Sent e tilla ha inoltrada per la fin dal 2011 a l'uffizi per il svilup dal territori dal Grischun per la preexaminaziun. Il Cussagl cumünal nouvelet stima la gronda lavur prestada da la cumischiun cun respet.

In vista cha'l Cussagl cumünal nouvelet ha però d'executar tuot la procedura da publicaziun da la revisiun totala da la planisaziun cumünala e stuvevess cun quai eir rapreschentar las ponderaziuns e decisiuns i'l rapport da planisaziun e cooperaziun, faja dabsögn da survgnir invista illa fatschenda. Per survgnir il temp necessari per consultar la revisiun e per na impuoner sforzs e cuosts superplü per üna procedura da preexaminaziun precipitada, decida il Cussagl cumünal d'inoltrar üna charta a l'uffizi per il svilup dal territori Grischun cul giavüschi d'iniziar la procedura da preexaminaziun pür cur cha'l Cussagl cumünal nouvelet dà l'acconsentiment.

8 800.427 Taxes d'erbadi

Taxes d'erbadi per Uina Dadaint

Il schef da pauraia orientescha sur d'ün cas da taxaziun d'erbadi chi füess da trattar differentamaing dals cas üsitats pel cumün da Sent. Daspö la stà 2010 inchargia il cumün da Sent las taxas d'erbadi tenor la cifra da chargiada d'alp chi retira eir contribuziuns (Stoss). Uschè as ha eir tramiss il quint da taxas d'erbadi per l'alpigiada 2010 e 2011 a sar Victor Peer per l'alpigiada in Uina Dadaint, sainza resguardar però il fat cha raduond la mità dal terrain pasculà aint in Uina Dadaint es in possess privat. Sün intimaziun da sar Peer as ha chattà la seguainta soluziun per l'inchasch: Causa cha las vachas (in media 12 tocs, resp. ca. la mità da la chargiada) pasculeschan adüna sün terrain privat e cha be il muvel süt fa adöver dal pas-ch cumünal, pudess il cumün da Sent metter in quint la mità da la cifra d'alpigiada, q.v.d. 13.7 chargiadas normalas. Tenor il schef da pauraia parevess quista calculaziun realistica uschè cha'l Cussagl cumünal decida da trametter a sar Peer ün nouv quint da taxas d'erbadi.

9 ORIENTAZIUNS

Punts pendentas Val Sinestra

Il capo orientescha ch'el haja survgni pro la surdatta da la carica tanter oter eir ün parair datà süls 21 lügl 2009 da la firma Cresta Geo chi ha examinà la sgürezza da las punts pendentas in Val Sinestra. Tenor il parair correspuonda la sua da las punts tant inavant a las pretaisas da sgürezza pel passagi d'ürant la stà. D'ürant l'inviern, cul pais da la naiv, nu correspuonda la sua in mincha cas na a la norma da sgürezza. Illa recapitulaziun dal parair vain rendü attent cha las punts nu correspuondan a las disposiziuns legalas da sgürezza e cha'l cumün pudess gnir fat respunsabel per eventuals dons ed accidaints.

La firma Cresta Geo ha agiunt al parair eir üna proposta da sanaziun da las punts chi prevazza, tenor calculs approximativs, cuosts da raduond 110'000.-- per punt, q.v.d. al minimum fr. 220'000.-- per las duos punts. Il capo es ün pa stut dal fat cha daspö'l 2009 nu sun gnüdas fattas ingünas masüras in quist connex e giavüscha cha'ls schefs respunsabels as fetschan impissamaints da la fatschenda.

Rumida da naiv

Il schef da vias in cumün orientescha cha la rumida da naiv in occasiun da las naiveras dal cumanzamaint da schner 2012 haja funcziunà in möd speditiv ed effiziant. Quista rumida professiunala ha però eir chaschunà cuosts da raduond fr. 67'000.--, sainza cha'ls scumparts interns per la rumida tras l'equipa e las maschinas dal cumün sajan amo resguardats. Tenor il preventiv 2012 as vaiva calculà, as basond süllas cifras indicativas dals ons avant, cun ün import da fr. 60'000.-- per la rumida da naiv. In quista situaziun extraordinaria vain il preventiv surpassà ed il schef da vias in cumün giavüscha da tour cogniziun da quist fat.

Don lingia electrica libra

Co cha'l schef d'energia orientescha es la lingia electrica libra tanter Sur En e la chava a Panas-ch Sura gnüda donnagiada fermamaing causa las naiveras. Per pudair garantir a l'Uina SA la furniziun da forza electrica sto gnir fatta üna reparatura provisorica. Per la sanaziun da la lingia definitiva esa però previs da far ün proget per metter la lingia suot terra. Quist proget gnarà suottamis prosmamaing al Cussagl cumünal.

L'actuara: